

四明叢書

張宗祥



畏齋集

四明張氏釣園開雕

序

吾鄉白楊袁舒沈四大儒出而象山之學傳東發果齋
二大儒出而朱子之學又傳畏齋程先生得果齋之傳
而私淑朱子者也先生之送阮照磨序也既詳述其淵
源而送牟景陽序又云未嘗高談性命而略事功未嘗
有意爲文人之文而文特妙此尤先生之自道者也究
觀數千年治道得失士大夫行己大節不惟深惜介甫
且以歐陽公之濮議蘇公之南北郊司馬公之役法謂
爲擇善未精固執以自誤者更謂後世君子恥言理財

而民益困苟祿之徒知進而不知退嗚呼大居敬而貴窮理先生有焉豈尋常談道之士哉夫讀書萬卷臨事袖手儒固爲世詬病蒲酒可翼延年服不終日欲希韓終又將爲座客笑矣先生才高官小終身文學掾理義在得所養青衫白髮西楚東吳自樂簞瓢浮雲萬事故其詩文不矜刻楮之智而有自然之妙蓋其學之所至者然也又豈獨有功文字哉集六卷爲清四庫鈔本世罕見余旣付梓因論述之以見先生之爲人民國二十年七月後學張壽鏞序

四庫全書提要

畏齋集六卷

元程端禮撰端禮有讀書分年日程已著錄其詩文名畏齋集見於黃潛所作墓誌而不著卷數諸家書目亦多不載故世久無傳惟散見永樂大典中者尙得詩文百餘篇謹依類編次釐爲六卷其學以朱子爲宗故作孫叔會詩集序云詩至七言而衰律而壞詞而絕自朱子出而古詩遺意復見蓋朱子之學不在乎詩故其作有自然之妙諷詠勸懲之實又送牟景陽序云蜀文再

變於魏了翁了翁學程朱學故未嘗有意爲文人之文而文特妙其全集宗旨不出於是夫朱子爲講學之宗誠無異議至於文章一道則源流正變其說甚長必以晦庵一集律天下萬世而詩如李杜文如韓歐均斥之以衰且壞此一家之私言非千古之通論也然所作尙皆明白淳實不骫於正而其持論亦足以矯淫哇豔冶之弊於文章尙不爲無功故糾其膠固之失而仍哀輯其佚篇備一格焉

鄞縣志本傳

程端禮字敬叔

元史韓性附傳

號畏齋

宋元學案

先世自鄱陽徙家

於鄞

○案歐陽元撰程端學墓志遷鄞之孫仕唐爲文林郎衛率府參軍杜工部有詩送程率府歸四明

是也

曾祖振父宋平江府百萬倉司門祖在孫知常熟縣

黃潛撰墓志

父立年十八爲鄉貢生元初當道累薦入仕不

就

歐陽元撰程端學墓志

端禮幼穎悟純篤十五歲能記誦六經

曉析大義慶元自宋季皆尊尙陸九淵氏之學而朱子

學不行於慶元端禮獨從史蒙卿遊以傳朱氏明體達

用之指

元史○案黃潛進學工程跋敬叔之傳本於考亭門人晏氏蓋史景正師陽岳岳師晏淵淵師

朱子初用舉者爲廣德之建平池之建德兩縣教諭在
建平興舉廢墜諸生之貧者必周給之縣尹王起宗率
僚吏聽其論說且築室赤巖上命子楚鰲受學楚鰲後
出入臺閣爲時名人在建德增學舍以居其徒盡復民
所占田其始至也有田三百畝比受代而去有田一千
畝復歷信之稼軒建康之江東兩書院山長稼軒前賢
遺迹多爲人所據悉按其籍奪而歸之江東新昇院額
臺府令有司選辟端禮以闡教事學者翕然知所宗仰
文宗在潛邸遣近侍子弟來學賜以金幣牢醴禮遇甚

至累考授鉛山州教諭新其廟學豪家築屋侵入仞牆
久莫能正白於部使者命毀其屋乃懼請以腴田二十
畝易之鵝湖書院旁有道觀端禮偶至其處有驢跑地
驅去復來默卜而發之得石碣十餘刻羣賢像因爲作
羣賢堂秩滿以將仕郎台州路教授致仕歸後郡守王
元恭踵門禮請爲學者師○案李好文鄉飲酒禮記至
正二年正月王元恭守郡行
鄉飲酒禮屬端禮與葉恆鄭覺民等攷訂肄
業悉依朱子爲定行於郡庠觀者莫不興起帥閭及旁
郡請行鄉飲酒禮皆俟端禮討論而後定○案李好文
鄉飲酒禮記
至正三年泰不華守紹興以書幣延致程君端禮仿而行之郡故有史浩所置義庫

以助仕族儒流婚喪之不給自端禮爲之督視貧者始
實受其惠嘗謂門弟子曰學問之道具在聖經賢傳真
知實踐則在乎人至正五年六月病劇進藥卻之目已
瞑頭微偏門人樂良進曰先生頭容稍偏矣復張目端
坐而逝年七十五墓志端禮以文學行誼高一時黃潛進學工程
跋色莊而氣夷善誘學者使之日改月化素有志於當
世仕不大顯故平生蘊蓄未克究於設施而私淑朱子
不爲無功於名教行省數聘校文鄉闈端禮以爲國朝
設科初意專取朱子貢舉私議今多違之吾往且不合

力辭不赴其源流本末可概見也墓志所作文章皆明白

純實不骫於正四庫提要著有讀書日程○案墓志作進學

學規程浙江采集書錄作國子監以頒示郡邑校官為

讀書分年日程互有異同
學者式元史

畏齋集卷一

元鄞縣程端禮敬叔撰

五言古詩

古意

東林有棲鳥中夜棲復起
礧礧繞樹飛悲鳴不能已
羈孤寡儔匹枝寒不可止
幽人發寤歎起步東軒址
大鵬飛南溟搏風九萬里
斥鷃無所適翱翔蓬蒿裏
爲大旣云樂小者亦自喜
爾於眾鳥中棲棲廼如此

南山有佳木枝葉何薿薿
客問此何木云是杞與梓
問

種此何爲棟梁專所擬問種幾何時百年殆不止客子
歎以愀吾謀豈及此春種秋已穫口腹且不理人生不
可期百年詎能俟

儀鳳何濟濟棲息在梧竹置之雞鶩羣肯與同飲啄所
性自不同匪因事乖激從茲鳴高岡銜圖集帝側

次史耕野借書韻

掩關臥空齋寡德嗟無鄰坐令日月易見茲夏木新俯
仰閱今古孰能返其淳有疑未云祛就正乏所親譬車
適千里曠焉迷路津聞君忽叩門起迎正冠巾議論一

超越諒非今世人遺我金玉章把玩良足珍言欲假詩
書討論意彌勤爲君出所藏不辭筐篋貧儻足爲君益
敢厭來往頻

雪野齋

混沌昔云判高下散眾殊山川互阻深道路饒崎嶇
六若有意補塞歸模糊誰知甚險艱行客多迷塗何如
萬原野坦坦皆康衢常時人素履此日心亦平平平展
天鏡蕩蕩開玉壺招遙踏廣寒汗漫遊青虛元翁心地
明直與此鏡俱融作一片玉皓皓歸太初

酬張荷屋惠酒之作

春風被草木華色一以妍散策登崇巘泛舟遡晴川悠
悠憺忘歸孤嘯激雲天嗟無同懷侶俾我心悁悁美人
在山阿貞操松柏堅攝衣往叩門一見情依然壺觴遠
見贈侑以金玉篇酒昭意不薄詩敘別經年惜哉不可
留整旆吾言旋短章聊爲報中懷詎能宣

送人遊越

會稽揚州鎮名實著典籍禹昔巡九土於焉會羣辟澄
湖三百里寒光湛空碧郊關連崇山噴沕類天劃古來

磊落士多此託棲息王謝有子孫風流猶未革欲遊無
方舟魂夢勞宿昔今君挂江帆迤邐詣幽蹟上探神禹
穴下訪王謝迹茲特江南奇氣象猶迫迮更爲嵩華遊
馳車陵谷客嗟我足如絀坐使歲月易

寄內

去年汝歸時汝父扶汝興今年汝歸時哭父攀靈車豈
期一年別罹此憂患俱人生不可保甚矣夢幻如汝哭
固有感汝行良可吁汝有堂上母亦復雪滿顙旣無門
楣喜生汝將何如

按如字
重押

幸汝有佳弟可樹先人廬汝